

**Date – 05/10/2024**

**Time - 18:30 -18:40Hrs**

**REGIONAL NEWS BULLETIN**

**HEADLINES (EVENING)**

- 1. PM Kisan kaltlangin Mizorama kuthnathawktu mi nuai 1 sing 1 za 2 sawmsarih pakua in DBT kaltlangin sum an dawng tawh.**
- 2. Tunhnaia Gauhati High Court thupek angin nimin piaha Council of Ministers thukhawm chuan Mizoram State Human Rights Commission din a remti.**
- 3. Vawiin khan Haryana Assembly inthlan tluang taka neih a ni.**
- 4. Prime Minister Narendra Modia chuan vawiin khan Maharastra-a Wasim atangin hmasawna hna project cheng vaibelchhe sing 2 sang 3 leh 300 hu a hawng.**

<><><>

**PM KISAN**

**PM Kisan kaltlangin Mizorama kuthnathawktute mi nuai 1 sing 1 za 2 sawmsarih pakua in DBT kaltlangin sum an dawng tawh.**

**Vawiin khan Prime Minister Narendra Modi chuan Washim Maharashtra atangin kuthnawktute tuam hlawnna scheme pui ber nia a ngaih PM Kisan hnuai 18th Instalment sum chu kuthnathawktu mi vaibelchhe 9.4 chuang hnenah Direct Benefit Transfer kaltlangin a semchhuak a. He hamthatna dawng zingah Mizoram a kuthnathawktute mi mi nuai 1 sing za 2 sawmsarih pakua telin, an hnenah a vaiin cheng vaibelchhe 31.6782 semchhuah a ni a, an account a DBT kaltlangin a lut a ni. Hei hi kum 2024 chhunga 2nd installment a ni.**

**PM Kisan hi kum 2019 atanga bultan niin khawvela kuthnathawktute puala DBT kaltlanga hamthatna lian ber nia sawi a ni a, Digital Marvel lian ber tih a ni bawk. He scheme-a in ziaklut te chuan thla li danah cheng 2000 zel dawngin a vaiin kum khatah cheng 6000 an account ah Direct Benefit Transfer hmangin an dawng thin a ni.**

<><><>

## **TOURISM MINISTER – HNAHSIN KUT**

Tourism Minister Pi Lalrinpuii'n Tourism kalphung tharah tualchhunga cheng hmanga khualzinte hip chu Mizoram sawrkarin kalpui dawn a ti a, a hlawhtlin theih nan sawrkar leh tualchhung mite tanrualna a pawimawh tih a sawi.

He thu hi vawiina Hnahsin Kut, Champhai-a a hmanpui na ah sawiin Minister chuan sawrkar hmalaknaa khualzin hip tumna chuan ngai neihna a thlen thin thu leh hlawhtlin tawk lohna a neih thin thu sawiin, Mizoram sawrkar chuan Tourism-ah kalphung thar tualchhunga cheng te hmanga khualzin hip a tum dawn tih sawiin sawrkar chuan mipuite hmalakna ah an hnung a dawl thin dawn a ti a, Hnahsin kut avangin mitinin Champhai pan an chak a, kut tan hma hauhva thlenna tur awm tawh lo chuan kut hlawhtlin zia a lan tir tih sawiin kalphung thara Tourism kalpui sawrkarin a tum dan hlimthla lanna a ni, a ti.

Pi Lalrinpuii chuan Champhai District chu hmunhma tihdanglam ngai lo hmun mawi, Mizo pi leh pu sulhnu tam ber awmna anih avangin khualzin mite hip turin theihna sang tak a nei a ni, a ti a. Swadesh Darshan 2.0 hnuaiah Tourism chawikanna tur hmalakna hrang hrang kalpui thuai tum a ni, a ti bawk.

Minister chuan Champhai chu India leh Myanmar ramri luhka anih angin ruihhlo do kawngah hmahruaitu ni turin a mi chengte a ngen a, Ruihhlo mai bakah HIV/AIDS natna hrikin Mizoramah bu nghet takin a khuar mek tih sawiin, a dona kawngah mimal, pawl, kohhran leh khawtlang tanrual a ngai tak zet tih a sawi.

Pi Lalrinpuii chuan Tourism Department-in Hnahsin Kut puala North Eastern Council atanga an sum hmuh - cheng nuai 8 chu Organising Committee te kutah a hlan a. Documents a fel hunah cheng nuai 2 dang pek leh tur a ni ang.

<><><>

## **DC&MA MINISTER**

District Council & Minority Affairs Minister Pu C. Lalsawivunga'n Mizo hnam anga dinchhuah theih nan inunauna leh inpumkhatna dah pawimawh a tul tih a sawi.

He thu hi vawiinaPang Zirlai Pawl (PZP), Joint Headquarters Aizawl buatsaih, zirlai tharte lawmluhna leh zirlai tithate lawmpuina I&PR Auditorium, Aizawl-a neih a hmanpuina-ah sawiin Pu C. Lalsawivunga chuan Mizorama chibil leh hnam peng hrang hrang awmte chu Mizo nihnain phuarkhawm zel se a duh thu sawiin, inla hrang tham leh inenhrang tham an awm lova, hetia inpumkhat leh lungrual taka chenho hian hnam zahawm an nih phah tih a sawi.

Pu C. Lalsawivunga chuan kal khawmte chu hnathawh hreh nei lo tur leh thawk lova awlsam taka sum lakluh tum tura fuihin mahni zawn theuhah taima leh rim taka thawk tur leh a thlawna dawn leh sem ringawt beisei lo turin a chah a. Zirna chu hmasawna rahbi pawimawh tak a nih thu sawiin zirlai kalkhawmte chu ram leh hnam tan a ni tih hriaa thiamna tak tak nei tura lehkha zir a, central service-ah tam zawk inziaktling thei tura tan la nasa turin a chah bawk.

<><><>

## SHRC

Tunhnaia Gauhati High Court thupek angin nimin piaha Council of Ministers thukhawm chuan Mizoram State Human Rights Commission din a remti.

Chief Minister Pu Lalduhoma kaihhruaia Council of Ministers thukhawm chuan Gauhati High Court in September ni 6-a thu a pek angin Mizoram State Human Rights Commission din a remti a, Gauhati High Court hian hemi din tur hian thla 2 chung hun pe a pe a ni.

Hemi chungchangah hian division bench Chief Justice Vijay Bishnoi leh Justice Michael Zothankhuma te kaihhruai thukhawm chuan Mizoram in Human Rights Commission a din lo chu tha an tih loh thu sawiin hma la vat turin thu an pe a, Court chuan State Human Rights Commission chu thla 2 chungah din anih loh chuan Supreme Court thupek angin 1993 Act hnuaiyah hremna na tak a awm dawn niin an sawi a ni.

<><><>

## HEALTH MINISTER

Health Minister Pi Lalrinpuii'n Mizoram sawrkarin thawktu indaih lohna phuhru turin theihtawp a chhuah mek tih a sawi.

He thu hi vawiina Champhai District Hospital a tlawhna ah sawiin Minister chuan Champhai District Hospital chu damdawiin fai lawmman 'Kayakalp Award' dawng tawh an nih angin, thawktute chu faina leh damlo enkawl kawnga an hnathawh tha te chhunzawm zel turin a chah a, Mizoram sawrkarin thawktu indaih lohna phuhru turin theihtawp a chhuah mek tih sawiin damdawiin hmun hrang hrang tih changtlun mek a ni a ti bawk.

Damdawiin a hun a hman zawh hian Pi Lalrinpuii hian Champhai Vengsang, Agriculture Rest House hmun hlui muala Convention Center sak tumna hmun a tlawh a. Convention Center hi Swadesh Darshan 2.0 hnuaiyah sak tum a ni a, chak taka hmalak mek a ni.

<><><>

## MTDA

Mizoram Truck Driver Association chuan Dur Lui leh Sairang inkar kawng NH 306 chu, hmalakna a awmlah chuan tlan loh thlenga hmalak an tum tih sawiin karleh nilaini hmaa siamtha turin Sorkar an ngen.

MTDA hian thuchhuah an siam ah Dur Lui leh Sairang inkar NH 306 kawng chu a chhiat avangin lirthei khalhtute leh an member-te atangin sawiselna an dawn tam avangin an enfiah hnuah kawng chu a chhe hle tih an finfiah an ti a, lirthei lian rit phur tan kal reng ngamna chia an ngaih loh thu leh kawngpui chhia chu lirthei khalhtute tan nunna chan palh theih hial khawpa chhia a nih avangin Sorkar chu tun thla October ni 9 ral hma ngeia kawngpui chhe zual siam turin an ngen an ti a, hemi hun chhunga hmalakna leh kawng siam hmuh tur a awm loh chuan Mizoram Truck Driver-te rit phura an kal ngam lo a nih pawhin Mizoram Truck Drivers Association chuan mawh an phur dawn lo an ti a, an tlan loh avanga ei leh bar-ah mipuiin harsatna an tawk palh a nih pawhin Mizoram mipuite hrethiam turin an ngen tih an sawi bawk.

<><><>

## ASF

Vawk pul hri leng mekah Lunglei khawpui veng chhung bazar tina phalna nei lova vawk talh an awm leh awm loh endik tura Joint Inspection Team chuan vawiin khan bazara sa talhna hmuna vawk talh leh vawksa zuarte an enfiah.

Joint Inspection Team hian inkaihhrainain a sawi angin AH&Vety Department atanga hri kai lo an ni tih nei lova vawk talh an awm leh awm loh an enfiah a, Vawk sa zuar te hian vetty depts atangin lehkha an dawn chu an tar hlawm a ni.

Joint Inspection Team hian Lunglei khawpui chhunga veng hrang hrang bazara vawk talhte chu a remchan danin a hmunah kal chilhin an enfiah thin dawn an ti bawk.

ASF hi tun dinhmun-ah Mizoram District hrang hrangah a la leng mek zel a, AH& Vety hotute hnen atanga thu dawn danin, kumin January atanga vawiin thleng khan ASF vanga vawk thi hi 13798 a tling tawh a, ASF vanga vawk suat tawh zawng zawng hi 22960 a ni a, vawiin khan ASF vanga vawk suat 84 awmin, vawk 12 an thi tih report a ni.

<><><>

## CADC INTRODUCED MIZO LANGUAGE IN SCHOOLS

Chakma Autonomous District Council CADC Executive Committee vawiina thukhawm chuan CADC huamchhunga zirna in ah Mizo subject tel tir a remti.

Thuchhuah tarlan danin CADC huamchhungah Mizo subject chu sawrkar hnuai zirna in hrang hrang leh Samagra Shiksha hnuai bakah tualchhunga zirna in hrang hrangah Mizo subject chu tel tir an remti a, primary atanga zirna sang zawk thlengin Mizo subject hi an zir dawn a ni.

Hemi chungchanga thuchhuah an siam ah Mizoram sawrkar atanga tanpuina an hmuh hunah CADC huamchhunga Mizo tawng zirtirtu tur an la dawn an ti a, sawrkarah dilna an thelut tawh tih sawiin bultan thuai an beisei tih an sawi baw.

<><><>

### HARYANA ASSEMBLY

Vawiin Haryana Assembly inthlan chu tluang taka neih a ni a. Hriat theih chinah tlai dar 3 thleng khan vote zaa 49 a tla tawh. Haryana-ah hian Assembly seat 90 awmin inthlan hi thawhkhata zawhfel tur a ni a. Voter vaibelchhe 2 nuai 3 sing 5 sang 4 leh 350 an awm a. Polling station 20,632 awmin candidate hi mi 1031 an awm.

Chief Electoral Officer Pankaj Aggarwal chuan polling station tinah inthlanna felfai leh zalen a awm theih nan ruahmanna siam vek a ni a ti a. Polling station tinah webcasting tih vek a ni baw.

<><><>

### EXTERNAL AFFAIRS MINISTER

External Affairs Minister Dr. S. Jaishankar chuan Shanghai Cooperationi Organisation (SCO) Summit lo awm turah India chuan Pakistan nena inlaichinna chungchang eng chi pawh a sawipui thei dawn lo a ti. SCO Summit hi tun thla ni 15-16 ah Pakistan khawpui Islamabad-ah neih a ni dawn a. IC Centre for Governance in New Delhi-a Sardar Patel Lecture an buatsaihah hemi chungchang hi sawilangin Pu Jaishankar-a chuan SCO Summit-a a tel tur chu ramdangte nena inlaichinna chauh a ngaihtuah dawn tih a sawi a ni.

<><><>

### PM

Prime Minister Narendra Modia chuan vawiin khan Maharastra-a Wasim atangin hmasawanna hna project cheng vaibelchhe sing 2 sang 3 leh 300 hu a hawng. Heng project te hi angriculture leh animal husbandry sector lama hna niin Pu Modia hian PM-KISAN scheme installment 18-na a pe chhuak baw a ni. Thusawiin Pu Modia chuan ramchhunga loneitu vaibelchhe 9.4 te chuan sawrkar atangin tanpuina cheng vaibelchhe sing 2 chuang an dawng tawh tih a sawi a ni.

Vawiin Prime Minister hun hmannaah Union Agriculture Shivraj Singh Chouhan, Maharastra Chief Minister Eknath Shinde leh sawrkar mi pawimawhte an tel a ni.

<><><>